

四書傳注會要

第十册

鍾肇鵬選◎編

國家圖書館出版社

四書傳注會要

第十冊

鍾肇鵬選○編
國家圖書館出版社

第十册目錄

論語後案二十卷(二) 清·黃式三撰

泰伯第八	一
子罕第九	七三
鄉黨第十	一七七
先進第十一	三〇三
顏淵第十二	三九一
子路第十三	四八一
憲問第十四	五六五

論語後案

定海黃式三學

泰伯八

子曰泰伯其可謂至德也已矣三以天下讓民無得而稱

焉

史記吳太伯世家引此文泰作太索隱引范甯曰太者善大之稱案泰古文作太隸作太从古文省也漢書地理志引此經亦作太德當作惠為正字得本亦作德見後漢丁鴻傳稱當作倂為正字

〔集解〕王曰泰伯周太王之長子次弟仲雍少弟季歷季

歷賢又生聖子文王昌昌必有天下故泰伯以天下三

讓於王季其讓隱故無得而稱言之者所以為至德也

集注泰伯周太王之長子至德謂德之至極無以復加者也三讓謂固遜也無得而稱其遜隱微無迹可見也蓋太王三子長泰伯次仲雍次季歷太王之時商道寢衰而周日彊大季歷又生子昌有聖德太王因有翦商之志而泰伯不從太王遂欲傳位季歷以及昌泰伯知之卽與仲雍逃之荆蠻於是大王乃立季歷傳國至昌而三分天下有其二是爲文王文王崩子發立遂克商而有天下是謂武王夫以泰伯之德當商周之際固足以朝諸侯有天下矣乃棄不取而又泯其迹焉則其德

之至極爲何如哉蓋其心卽夷齊扣馬之心而事之難處有甚焉者宐夫子之歎息而贊美之也泰伯不從事見春秋傳

〔後案〕三讓者讓周國也鄭君曰泰伯周太王之長子次子仲雍次子季歷太王見季歷賢又生文王有聖人表故欲立之而未有命太王疾太伯因適吳越采藥太王沒而不返季歷爲喪主一讓也季歷赴之不來奔喪二讓也免喪之後斷髮文身三讓也皇疏引范甯說言泰伯一讓王季二讓文王三讓武王王氏論衡四諱篇言

太王薨太伯奔喪再讓王季不聽三讓曰吾之吳越吳越之俗斷髮文身刑餘之人不可以爲宗廟社稷之主王季知不可權而受之諸說各異其爲讓周國則同也讓國而云天下者以當日言則讓國以後日言則讓天下夫子言稷躬稼而有天下孟子言文王一怒而安天下之民語意相似自朱子始有讓商之說云太王有翦商之志太伯不從陳安卿曰當時天命時勢猶未也太王乃睥睨于下豈得不謂之邪志泰伯固讓爲成父之邪志且自潔其身而以所不欲者推之後人何爲至德

顧亭林曰將稱泰伯之讓而先以莽操之志加諸太王豈夫子立言之意合觀諸說知三讓之必爲讓周也無得而稱得一本作德見釋文後漢書丁鴻傳引經亦作德李注又引鄭君注云三讓之美皆蔽隱不箸故人無德而稱據李注則鄭君注亦作德無德而稱猶言無德以稱而以也後漢書黃憲傳將以道周性全無德而稱乎語意正同歸熙甫曰伯夷順其父之志而以國與弟然終於叔齊之不敢受而父之志終不遂矣夫家人父子之間豈無幾微見於顏色必待君終之日相與褻褻

去之民將得因而稱之泰伯不讓於傳位之日而於采
藥之時是蓋有伯夷之心而無其迹夫子所以深歎其
不可及也李安溪曰伯夷讓於父沒之後則父過既彰
宗社終於無主不如泰伯之去於事先而泯其迹其無
讓名也乃所以善處父子兄弟之閒而爲德之至也式
三案揚子法言曰不爲名之名其至矣乎爲名之名其
次也則德以無稱而至也

後案又曰朱子讓商之說所據者詩魯頌左氏僖公五
年傳耳魯頌實始翦商據段懋堂以翦爲荆之借字說

文荆齊斷也與毛傳翦齊之訓相合周至太王規模氣
象始大可與商竝立故曰齊後漢書西羌傳武乙暴虐
犬戎寇邊周古公避於岐下太王遷岐在武乙暴亂之
時德化所及勢與商齊夫復何疑左傳云泰伯不從朱
子以爲不從翦商之志金吉甫謂傳不言所以不從者
爲何事史記周本紀吳世家皆不言翦商之志是謹遵
朱子者於此亦有異議段氏曰春秋經從祀先公左傳
使亂大從從順也太伯不從謂不肖順其長幼之次耳
式三案史記晉世家泰伯亾去是以不嗣司馬子長引

經傳有不明者每易字而明義此以不從爲亾去其義是也段氏說亦分明凡此皆可以校正朱子注而知讓周之說爲是也二程外書明道曰泰伯知王季之賢必能開基成王業故爲天下而三讓之言其公也伊川曰泰伯三以天下讓者立文王則道被天下故泰伯以天下之故而讓之也不必革命使紂賢文王爲三公矣二程之說如此皇疏或說內已有此意近儒申此者謂夫子所言非指周家之天下亦非指商之天下且謂泰伯身爲世子國非世子所有不得云讓國者式三謂如程

說經當作以天下而三讓申之者尤非程子本意

子曰恭而無禮則勞慎而無禮則憊勇而無禮則亂直而無禮則絞

集解憊畏懼之貌言慎而不以禮節之則常畏懼馬曰絞絞刺也

集注憊畏懼貌絞急切也無禮則無節文故有四者之弊

後案憊作認爲正鯁憊鯁經及子史通用字說文所無荀子曰認認然常恐天下之一合而軋己也漢書引荀

子認作鯁注蘇林曰讀如慎而無禮則憇之憇懼貌也
文選魏都賦誰勁捷而無獯李注亦引此經是古字通
用也恭無禮則勞慎無禮則憇者人有一尊長之晉接
一艱大之投遺而手足無所措耳目無所加者由於未
嫻禮節恭其所不必恭慎其所不必慎也勇亂直絞則
徑情之爲害也聖教重約禮人苟無禮柔固悔剛亦悔
君子篤於親則民興於仁故舊不遺則民不偷

〔集解〕包曰興起也君能厚於親屬不怠遺其故舊行之
美者也則民皆化之起爲仁厚之行不偷薄也

〔集注〕君子謂在上之人也興起也偷薄也○張子曰人道知所先後則恭不勞慎不憊勇不亂直不絞民化而德厚矣吳氏曰君子以下當自爲一章乃曾子之言也愚按此一節與上文不相蒙而與首篇慎終追遠之意相類吳說近是

〔後案〕吳才老指爲曾子之言臆說耳據禮少儀注齊語正月之朝篇注引經題孔子曰漢書平帝紀五年詔引此經顏注以爲孔子之辭篤竺之借字說文篤馬行頓遲也竺厚也偷愉之借字說文愉薄也愉又有暫義周

禮以俗教安則民不愉注愉謂朝不謀夕此經愉對故
舊言訓爲暫義正通說文無愉字女部媮巧黠也此今
愉盜之本字凡經傳中媮愉字訓薄訓暫訓苟且者正
字當作媮媮之訓取者正字當作媮媮

曾子有疾召門弟子曰啟予足啟予手

集解鄭曰啟開也曾子以爲受身體於父母不敢毀傷
故使弟子開衾而視之也

集注啟開也曾子平日以爲身體受於父母不敢毀傷
故於此使弟子開其衾而視之

後案說文后開也啟教也訓啟爲開是借啟爲后字式
三謂手足不毀傷何待開衾啟爲啓之借字啓者省察
之謂曾子自述其平日一舉動之必察也說文又引作
跂存異說也

詩云戰戰兢兢如臨深淵如履薄冰

古冰字作夂
冰古凝字

集解孔曰言此詩者喻己常誠慎恐有所毀傷也

集注詩小旻之篇戰戰恐懼兢兢戒謹臨淵恐墜履冰

恐陷也曾子以其所保之全示門人而言其所以保之
之難如此

而今而後吾知免夫小子

集解周曰乃今日後我自知免於患難矣小子弟子也呼之者欲使聽識其言

集注至於將死而後知其得免於毀傷也小子門人也語畢而又呼之以致反復丁寧之意其警之也深矣○程子曰君子曰終小人曰死君子保其身以沒爲終其事也故曾子以全歸爲免矣尹氏曰父母全而生之子全而歸之曾子臨終而啟手足爲是故也非有得於道能如是乎范氏曰身體猶不可虧也況虧其行以辱其